

Сийрат дарслари (5-дарс)



11:02 / 29.10.2018 5563

* * *

20. Жобир ибн Самура розияллоҳу анҳудан ривоят қилинади:

«Расулulloҳ соллаллоҳу алайҳи васалламнинг оғизлари кенг, кўзлари каттароқ ва товонларининг гўшти оз эди».

Муслим ривоят қилган.

* * *

21. Анас розияллоҳу анҳудан ривоят қилинади:

«Расулulloҳ соллаллоҳу алайҳи васалламнинг сочлари қулоқларининг ярмигача тушиб турарди».

Муслим ривоят қилган.

* * *

22. Абдуллоҳ ибн Шиххийр розияллоҳу анҳудан ривоят қилинади:

«Набий соллаллоҳу алайҳи васалламнинг ҳузурларига бордим. У зот намоз ўқиётган эканлар. Кўксиларидаги йиғидан худди қайнаётган қозоннинг овозига ўхшаш овоз чиқиб турар эди».

Абу Довуд, Насоий, Ибн Хузайма, Ибн Ҳиббон ва Ҳоким ривоят қилишган.

* * *

23. Умму Ҳонеъ розияллоҳу анҳодан ривоят қилинади:

«Расулуллоҳ соллаллоҳу алайҳи васаллам Маккага келдилар. У зотнинг сочлари тўрт ўрим эди».

Абу Довуд ва Термизий ривоят қилишган.

* * *

24. Оиша розияллоҳу анҳодан ривоят қилинади:

«Расулуллоҳ соллаллоҳу алайҳи васаллам гапни сизларга ўхшаб шошилиб гапирмас эдилар, аксинча у зот бўлиб-бўлиб гапирар эдилар. Олдларида ўтирган одам ёдлаб олар эди».

Бухорий, Муслим ва Термизий ривоят қилишган.

* * *

25. Анас ибн Молик розияллоҳу анҳудан ривоят қилинади:

«Расулуллоҳ соллаллоҳу алайҳи васаллам тушунарли бўлиши учун сўзни уч марта такрорлар эдилар».

Термизий ва Ҳоким ривоят қилишган.

* * *

26. Оиша розияллоҳу анҳодан ривоят қилинади:

«Набий соллаллоҳу алайҳи васаллам гапни шундай (дона-дона) гапирар эдиларки, агар сановчи санаса, санаб улгурарди».

Бухорий ва Муслим ривоят қилишган.

* * *

27. Абу Ҳурайра розияллоҳу анҳудан ривоят қилинади:

«Эй Аллоҳнинг Расули! Бизга ҳазил-мутойиба қияпсизми?» дейишди. «(Лекин) мен фақат ҳақни айтаман», дедилар».

Термизий ривоят қилган.

* * *

28. Абдуллоҳ ибн Ҳорис ибн Жазъи розияллоҳу анҳудан ривоят қилинади:

«Расулуллоҳ соллаллоҳу алайҳи васалламдан кўра кўпроқ табассум қиладиган бирор кишини кўрмадим».

Термизий ривоят қилган.

Бошқа ривоятда: «Расулуллоҳ соллаллоҳу алайҳи васалламнинг кулгилари фақат табассумдан иборат эди», дейилган.

Термизий ривоят қилган.

* * *

29. Жарир ибн Абдуллоҳ розияллоҳу анҳудан ривоят қилинади:

«Мусулмон бўлганимдан кейин Расулуллоҳ соллаллоҳу алайҳи васаллам мендан сира ўзларини тўсмадилар ва қачон кўрсалар, табассум қилар эдилар».

Бухорий, Муслим ва Термизий ривоят қилишган.

* * *

30. Анас ибн Молик розияллоҳу анҳудан ривоят қилинади:

«Набий соллаллоҳу алайҳи васаллам одамларнинг энг хулқи гўзали эдилар. Менинг укам бор эди. Уни Абу Умайр дейиларди. Кўкракдан ажратилган эди деб ҳисоблайман. У зот қачон келсалар: «Эй Абу Умайр, нима қилди нуғайр?!» дердилар. Буни у ўйнаб юрган нағр қуши сабабли айтардилар. Гоҳида уйимизда турганларида намоз ўқимоқчи бўлардилар. Остларига солинган нарсани супуриб, сув сепилар ва у зот турсалар, биз ортларида турардик ва бизга намозга ўтар эдилар».

Бухорий ва Муслим ривоят қилишган.

* * *

31. Анас ибн Молик розияллоҳу анҳудан ривоят қилинади:

«Бир киши Набий соллаллоҳу алайҳи васалламнинг ҳузурларига келиб: «Эй Аллоҳнинг Расули, мени уловга миндилинг», деди. «Сени урғочи туянинг боласига миндирамиз», дедилар. «Урғочи туянинг боласини нима қиламан?» деди у. Шунда Набий соллаллоҳу алайҳи васаллам: «Туяларни урғочи туялар туғади-ку!» дедилар».

Абу Довуд ва Термизий ривоят қилишган.

«Оламларга раҳмат пайғамбар» китобидан